

Diasabra Beth Holloway-Twitty a topa cu Prome Minister Nel Oduber **Preocupacion ta, dia 4 di September ta asercando, y te ainda no ningun hende por contesta e pregunta: “Kico a pasa cu Natalee y unda e ta?”**



Diasabra ultimo, Beth Holloway-Twitty a topa cu Prome Minister Nel Oduber den su despacho. Despues di e encuentro aki, nos di AWEMainta a papia cu Prome Minister Nel Oduber pa sa meta di e bishita aki.

Según e mandatario, for di prome dianan di e investigacion, e tabata den exterior y unabes bek na Aruba señora di Nel Oduber y su persona a bai bishita Beth Holloway-Twitty y su esposo, unda nan a conta nan tur nan problema y den kico nan ta pasando.

Según Prome Minister Nel Oduber, sigur e ta hopi preocupa, pasobra aki ta trata di un hoben estudiante cu a caba di gradua y tin un futuro briyante su dilanti, awe no tei mas. Mescos cu tur mayor na Aruba ta stima nan yiunan, asina aki tambe Beth Holloway-Twitty tambe ta sinti y kier haya su yiu bek.

“Mi a keda afo for di tur investigacion, pero asina mes mi tabata sigui e investigacion pa sa con ta bayendo. Nos ta yegando na casi conclusion

di e investigacion”, tabata palabranan di Prome Minister Nel Oduber.

Pa loke t’e criticanan cu Beth Holloway-Twitty y su famian por tin of a expresa, Nel Oduber a bisa, cu ningun dia, e persona aki a critica su persona, lo contrario, for di prome dia cu e tabatin bon experiencia cune y cu Nel Oduber t’e unico persona pa Beth Holloway, den kende e tin e ultimo speranza y pesei e combersacion di diasabra ultimo.

Como Prome Minister y mirando e bon relacion cu Nel Oduber tin cu funcionarionan Mericano, e.o. funcionarionan di CIA, a topa cu Secretario di Estado, Condoleeza Rice, y Oduber a anuncia cu proxima mente e lo trece Aruba algun Congresista di mas importante di Merca, y tur esaki pa su bon relacion cu Nel Oduber tin cu nan. Pesei Aruba no por laga un caso isola dañá e relacion aki.

“Si t’asina cu tin prensa Mericano y mi a bisa Beth Holloway-Twitty, cu ta

abusando. Mi a adverti’e p’e ta un tiki cauteloso di generalisa. Nos tin un bon Cuerpo Policial y un bon Ministerio Publico.

Bon por ta cu tin hende den e institutonan menciona, cu no a haci nan trabou manera mester ta, pesei esei no ta duna ningun hende e derecho pa generalisa”, tabata loke e.o. Prome Minister Nel Oduber a bisa Beth Holloway-Twitty diasabra ultimo.

Su peticion haci diasabra ultimo na Prome Minister Nel Oduber tabata, cu como cu nos ta yegando dia 4 di September, y cu si no tin nada concreto mas, lo por nifica cu Joran van der Sloot lo por worde laga liber of Ministerio Publico mester tin suficiente prueba pa presenta e caso den Corte di Husticia.

Esei t’e preocupacion di Beth Holloway-Twitty, kende tabata kier sa, kico awor? Kico lo pasa? Pero e mama desespera aki kier mira pa gobierno sigui haci esfuerzo pa busca claridad di e desaparicion di Natalee. Wel, según



Nel Oduber, el a garantisa e mama esei, ya como Prome Minister nos lo sigui mira kico a sosode exactamente.

“Mi a priminti’e cu lo bin un comision y mi a papia cu Presidente di Corte Comun di Husticia, mr. Luis Delannoy, p’e investiga kico a sosode. Famia Holloway-Twitty su reclamo grandi ta y mi tin comprension p’esaki, pakico no a detene e 3 hobennan for di prome dia, pero te despues di 14 dia.

Nan no por compronde con e investigacion a cuminsa y e famia ei no ta convenci, y ami tampoco, di tur e motibonan tecnico cu tabatin”, según Nel Oduber.

Gobierno tambe pa futuro, mester por siña di cosnan cu no a bai bon. Como Prome Minister, ora e kier a tuma cierto paso, el a worde critica, tanto den Cuerpo Policial y tin medionan di comunicacion cu a atak’e, pero nan mester compronde cu e no ta haci’e, pasobra e kier stroba e investigacion of e por ta contra di cierto hende. No, nos tin un nomber pa cuida, esei ta di Aruba y Nel Oduber ta sigur su el a worde permiti pa haci loke e kier a haci, por ta e situacion lo ta diferente awe.

“Pesei e ta hacimi dolor, ora mi mira television anochi, cu

tin un hende ta cuestiona nos sistema, nos Cuerpo Policial, siendo cu nos sistema y nos polisnan a resolve un cantidad di caso. Nos tin un bon sistema. Pesei mi ta haya cu nos mester haci tur esfuerzo ainda pa haya sa kico a sosode exactamente”, según Prome Minister Nel Oduber den declaracionnan haci pa AWE-Mainta.

E mandatario a bisa cu el a discuti henter mainta cu mama di Natalee, ta pakico tin tanto cambio di storia. Si bo a sali cu un mucha muher y boso a trata otro asina netchi, dicon bo no a hib’e te na su kamber di hotel?

Un cabayero hamas lo laga un mucha muher asina bandona. Esei Nel Oduber no por compronde y si a lague bandona, ta pasobra algo a sosode.

Ta tur e cosnan aki nos mester pone na otro, sin mester di bai ataca otro, ya cu bida tin logica. Si nos bai cu logica, e caso aki por ta solucioná caba, según Prome Minister Nel Oduber. E pregunta logico di mama di Natalee ta: Unda su yiu ta y kico a sosode?

Lamentablemente te awe no tin un contesta riba e preguntanan aki.